

Հ Ա Յ Ո Յ Լ Ե Ջ Ո Ի Ն

Մենքու Մաշտոցն ասաց՝ որդիս,
 Էլ ինչո՞վ ես յոյսը բերդիս,
 Էլ հայրենիք ինչո՞ւ եկար,
 Երբ կը խօսես օտար լեզուով,-
 Խմես հայոց գինին նեկտար՝
 Կենաց կանչես օտար ելզուով,
 Քաղես հայոց վարդերն ու հեզ
 Աղջիկ կանչես օտար լեզուով,
 Բայց աղջիկը փուշ կը տայ քեզ,
 Թէ պաշպչես օտար լեզուով:

Իրաւ, քանի լեզու գիտես՝
 Այնքան մարդ ես՝ իրան ասին,
 Բայց որ քո հայ լեզուն չունես,
 Էլ ի՞նչ յոյս ես քո Մասիսին,
 Որ թաղել ես քո մայրենին՝
 Հարամ է քեզ հայոց գինին,
 Հարամ է քեզ աղջիկն հայոց,
 Հայոց սիրտը՝ Մասիսն հայոց,
 Մայր հայրենիքն էլ ի՞նչ սրտով
 Քո ոտքերն էլ գրկէ վարդով...

...Ախ չէ, Մասիսն հալալ է քեզ,
 Հայոց վշտում դու մեղք չունես,
 Հալալ է քեզ հողն հայրենի,
 Թող քեզ ջուրն էլ դառնայ գինի,
 Քանզի՝ ասա էլ՝ այս քառսում՝
 Օտարն հայոց մահն է ուզում...

Բայց նա է հայ, ով յովազի

Արնախում էլ

Երախում էլ

Իր մայրենի լեզուով խօսի,
 Մօր կաթի հետ ծծած լեզուով,
 Որ հայ գետը ծով ծնի, ծով:
 Ժխորում էլ Բաբելոնի
 Խօսի լեզուով իր մայրենի.
 Հայոց լեզուով, որ միշտ ջահել,

Մեզ բիր դարեր հայ է պահել,
 Մեր սուրբ լեզուն, որ իբրեւ սար՝
 Ողջ ազգերին է հաւասար:
 Մեր ողնաշար, մեր ազգի սին,
 Չնաշխարհիկ հայոց լեզուն,

Որ մշտալէս

Մասիսի պէս՝

Ընդդէմ ձուլման ան ու մահի՝
 Մեզ յաիտեան հայ կը պահի,-
 Թէպէտ կտրել են դեռ ուզում
 Հայ բերանից հայոց լեզուն,
 Բայց չի մտնի օտար պատեան
 Հայոց լեզուի թուրն յաիտեան,

Պիտի երգէ,

Միշտ կայծակէ

Մեծ Մաշտոցի բազուկն անգին՝
 Հայոց լեզուն Թուր-Կայծակին:

ՅՈՎՀԱՆՆԷՍ ԾԻՐԱԶ

